

Takurda-o Burus ayoore-o o wu gene  
yan-dor Yeso n-me un bo-o  
o-Tasaronika

Rem-se ro n-me à:

M-zante 1:1-2

Ur-bongon us-tor ne 1:3-12

Ur-kewes un ma-to un haan-m Kiristi 2:1-17

Do ye un jaab-o ur-hur un she'et-de un yan-dor 3:1-15

Ur-kom 3:16-18

*Ur-gas*

<sup>1</sup> Be un de Burus, mosse un Siras ne,\* un Timoti ne, genbe ka takurda-o, ha-mo un be-de un hun-ne yan-dor un bo-o o-Tasaronika ye ro hun-ne ye Shir à Tato na un Wan-Koyan ne Yeso Kiristi.†‡

<sup>2</sup> Um konog Shir o-Tato un Wan-Koyan ne Yeso Kiristi remen ye ye'et no m-yar un gwugwu-mo ur-hur ne.

*Ur-bongon ur-gas ne*

<sup>3</sup> Or te ne, depete te bum Shir ko de ke ho-de rem no, komo kaane ro ur-bon ne, remen sher-m no ro m-bo'ose, komo was-mo no wasse or no ne à mo ro m-do. <sup>4</sup> Remen kaane, kap un n-me un hun-ne yan-dor-ye Shir, no ye tette un uk o-cin remen gaag un men-ut no un sher-m no ne un ka range-o kumu no ut-meger ne amba no 'mo ur-hur à.

<sup>5</sup> Kap yo ka kutute unze Shir ro un piish ut-ma ur-bon ne, yo ka komo rwuntute cas unze no bo'oste m-she'et un

---

\* Bor-o gaan:1 1:1 ut-Girik: Sirabanus. † Bor-o gaan:1 1:1 Wu Shir daagne à. ‡ Bor-o gaan:1 1:1 Hyen komo: Seng 17:1.

gwomo-to Shir remen ka gwomo-to, o notte un swo ur-koob. <sup>6</sup> Shir ro un men-ut pus-to ne, remen kaane, ka ye ro no m-'ya ur-koob à wua tope ye un reesu un ye ur-koob ebe un ye. <sup>7</sup> Amba no ye ro un swo ur-koob à wua wuwussu no, har ma un te ne. Yo ka a kor un ho-de Wan-Koyan Yeso he m-rwuun n-Ton shir un rem-de o-ra à, mosse un yan-tom-ye Shir ye un wu ne ye ur-beeb. <sup>8</sup> Wua rangse ka ye nape Shir á un ka ye yage nome un Ma-to m-Rerem o-dorotte à to ma Wan-Koyan na Yeso. <sup>9</sup> A 'ye ye koob-de ba m-ta, a dos ye un co-o Wan-Koyan un seps-mo un beeb-de un wu ne. <sup>§</sup> <sup>10</sup> Un ka da-o, wu he m-muun a ye'et wu m-sek à, yan-ba-ur-ba'as yea seps wu. Kap yan-dor komo yea hyen made-o un wu un ka ho-de mosse un no ne, remen no shereg un ka ma-to te ruru no à.

<sup>11</sup> Un yo ka ne ur-hur, o rwo'e tette us-kon rem no koyanda, remen no ya'asté Shir ur-bongon. Te us-kon noa she'et un ka cow-yo Shir cone à. Nom no kaane remen no waragte rii-yo Shir dektu no à. Komo te us-kon Shir a ya'as no beeb-de m-shoos un ko yo ke rii-yo ur-bon yo remen no m-sher be-ur Yeso Kiristi. <sup>12</sup> Te us-kon un bo a he seps un jin-ur Wan-Koyan na Yeso n-me un no à, no komo n-me un wu, hond hond un yar-mo Shir na, un Wan-Koyan ne Yeso Kiristi.

## Bor-us yoor

### *Ko-Gwomo-wu o-zang*

<sup>1</sup> M-moka, or re ne, um conog um ruru no se ken remse mosse un muun-m Wan-Koyan na Yeso Kiristi un komo bo a he na m-morogse ne be-de un wu à, te no us-kon:\*

<sup>2</sup> Taase hur-ur no nukte hor-m-hor, ko komo can-yo un

---

§ Bor-o gaan:9 1:9 Hyen komo: Isha 2:10. \* Bor-us yoor:1 2:1 Hyen komo: 1Tas 4:15-17.

wur-o no ine unze ho-de un Wan-Koyan rege de woosunte á. A nom wu ken wu a hoks m-rwor n-me un ma-to o-Kukt, ko be-de un rwor ut-ma, ko gengen sa o zee be un te to rwuune. <sup>3</sup> No jar o-jar no yage wu ken wu raks no un yo ken cow-yo á. Me un zee kaane remen ka ho-de a woon á se a inite zang komo ká ko-gwomo-wu o-zang wu rusune cas, wata ka wu a nome den-o o-ra à. <sup>4</sup> Wu ro ka wa-ut-yage-wu. Wu ro un seps un hi un de un wu un yage-to un kap rii-yo piye jin-de Shir à, ko komo wu a m-kwukte à. Har ma wu ro m-she'et un kwuur-o Shir un Pyo-o Shir wu ro m-zee unze wu ro Shir.†

<sup>5</sup> ¿No baks, da-o um ro un no ne à, um rurutu no to kà kap á? <sup>6</sup> M-moka no nipse rii-yo wene to m-kor à, taase yo kor cin ba da-o wo un woon. <sup>7</sup> Remen ka ko-Gwomo-wu o-zang wu teksunte m-senge wukusse. Amba ka wu ro m-wen à wua re co m-wen har da-o Shir he wu m-doss o-cow à. <sup>8</sup> Un ka da-o a he ka ko-Gwomo-wu o-zang wu m-rwunte cas, amba un muun-m Wan-Koyan Yeso, Yeso a ho wu un shik-mo un nu-o un wu, wu sabre wu un seps-mo un wu ne.‡ <sup>9</sup> A nep haan-mo un ko-Gwomo-wu o-zang be-de un senge-mo un ko-Gwomo-wu un ya-ut-kot. Wua nom rem-se o-made, ut-napa ne, ut-hyat ne to ut-bo go-us-go.§ <sup>10</sup> Wu ro m-raks un ye ro un bu-yo un den-o o-ra à remen ye ginimte m-was un yo ro o-nip à, komo remen kaane yea kum gwu á. <sup>11</sup> Remen kaane Shir a tomnuntu ye caari-to ut-raks remen ye sheret be-de ut-bo. <sup>12</sup> Wu un nom kaane remen a kupsute kap ye yage m-she be-de o-nip à ut-ma, ye ro komo m-hoge un zak-o m-nom un men-ut jaas-to à.

*Es no m-'wons ne*

---

† Bor-us yoor:4 2:4 Hyen komo: Dane 11:36; Izik 28:2. ‡ Bor-us yoor:8 2:8 Hyen komo: Isha 11:4. § Bor-us yoor:9 2:9 Hyen komo: Mati 24:24.

## 2 Tasaronika-ne Bor-us yoor:13 4 2 Tasaronika-ne Kiristi

<sup>13</sup> Depete te bum Shir rem no, or re ne no ye Wan-Koyan wasse un no ne à, remen cin ur-takan Shir daagu no, no kumut gwu un bu-yo un Kukt-o Shir muutu no ba m-kukop un komo bu-yo un sher o-nip ne à. <sup>14</sup> Wu un agan no un bu-yo un ka Ma-to m-Rerem to, to te ya'u no à, remen no kumut seps-m Wan-Koyan na Yeso Kiristi. <sup>15</sup> Remen kaane, or re ne, es no ur-beeb ne, komo no bup ka nip-o te yoosu no à, ko un ma-to nu, ko komo gengen.

<sup>16</sup> Te us-kon be-ur Wan-Koyan na Yeso Kiristi un hi un de un wu, un Shir ne Tato na rem no. Wu wasu na à, un yar-mo un wu, wu 'ye na jaab-o ut-men o un ba m-ta, o-sakto ne o ur-bon un bu-yo yar-mo un wu. <sup>17</sup> Komo te un kon-se Shir unze wu 'ye no jaab komo wu dowe rwun-us no m-'wons, n-me un ko mo ke senge-mo, mo m-nom m-cep ne à.

## Bor-us tet

### *Kon no Shir rem te*

<sup>1</sup> Ur-kom or re ne, kon no rem te remen ma-ut Wan-Koyan nomot hor-mo m-wo ko kene, komo to kum m-seps bo to kume be-ur no à. <sup>2</sup> Komo no kon bo a he na m-gu un kom-to un hun-ne yan-men-ut jaas-to à, remen ba kap mo un hun-ne ye shere á. <sup>3</sup> Amba Wan-Koyan wu ro ko-yan-ess ut-ma, wua dowe rwun-us no ur-beeb, wu 'er no be-de un ka wan-men-ut jaas-to wu. <sup>4</sup> Ya te ro sasa un Wan-Koyan ne, remen no m-dore un yo te ruru no à, komo no he co m-dore un yo te rwo'u no à.

<sup>5</sup> Te us-kon unze Wan-Koyan na Yeso wua ru no sen-gute, be-de un was-mo Shir, un 'mo-mo ur-hur ne mo Kiristi ro m-'ya à.

*Ur-kewes taase a she'et  
she'et-de o-hwaa*

<sup>6</sup> Or te ne, te ka'agte nō un jin-ur Wan-Koyan na Yeso Kiristi, ru nō cōw-yo un kō wū ke, wū rō un she'et-de o-hwaa à, wū rō un dorotte-o un ká rii-yo te yoosu nō á. <sup>7</sup> Ai, nō un hi un nō, nō nepse depete nō dore sha-m te, remen da-o te ro be un nō à, te ya-m-zar-ye á, <sup>8</sup> komo te re rii-yo m-re m-yar be-de un net á. Amba te swoog ur-koob, te m-senge m-how, m-tet ne, taase te sawse wū ken wū be-ur nō us-nu. <sup>9</sup> Te un nom yo ka, ba remen tett o ur-beeb te hobt gwū á, te un nom kaane remen te kututú nō bu-yo m-dore. <sup>10</sup> Da-o te ro be-ur nō à, te ro nō m-rure un yo ka: “Kap bon wū yage nom m-senge à taase wū re á.”

<sup>11</sup> Te hogute unze ye ken ye be-ur nō ya-m-zar-ye, komo ye rō m-nom un yo ken rii-yo á se o-hebe gwuw. <sup>12</sup> Un jin-ur Wan-Koyan Yeso Kiristi gon ka hun-ne ye, ye jar á. Te ka'agte ye, ye nom m-senge un ess ur-hi ne, remen ye reegtuté hi un de un ye. <sup>13</sup> Amba nō or re ne, taase nō ker un nom un rii-yo ur-bon.

<sup>14</sup> Urege wū ken wū yagute nom o-dorotte un rii-yo te rwore n-me un ka takurda-o á, ruru nō yan-dor Yeso wū. Nom nō ja un wū ne m-sok ne, komo nō som wū remen wū hoguté m-'e. <sup>15</sup> Amba nō muut wū wa-ut-yage á, amba nak nō gon wū ut-to remen or na wū wan-dor.

### *Gas-de ur-kom*

<sup>16</sup> Te un kon-us Wan-Koyan un hi un de un wū, remen wū ye'et nō m-gwugwū koyanda komo un kō yo ke bu-yo. Wū rō takan-de un gwugwū-mō un hur-ut na à. Wan-Koyan wū rō un nō ne kap.

<sup>17</sup> Un kom-ut re, Burus, um genbe ka gas-de. Un gon ka bu-yo me m-gen un kō o ke takurda-o. Kaane me m-gen.

<sup>18</sup> Yar-m Wan-Koyan na Yeso Kiristi rō un nō ne kap!

## ut-Hun New Testament

Hun-Saare: ut-Hun New Testament New Testament

copyright © 2017 Wycliffe Bible Translators, Inc.

Language: Hun-Saare

Contributor: WBT Central Zone

© 2017 Wycliffe Bible Translators, Inc. in cooperation with the Ut-Hun Bible Translation Project All rights reserved. The New Testament in ut-Hun (Eastern Dukawa)

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 30 Nov 2021

4b40cd80-7cb8-5d3d-8563-557f030f99d7